

**Te Moni.** Ehara i te mea he iwi rawa-kore te iwi Maori. Kaore, he iwi whaitaonga. Engari kua anga ke atu te ngakau o te iwi Maori ki nga mea manawareka o te ao. Kua wareware ki nga mea e ata tupu ai a koutou tamariki, e ora ai o koutou wairua. Ehara tenei kupu i te kupu whakahe i te mahi hipi, pamu, aha, aha, a te iwi Maori. Kaore, he mea pai tera kia kitea to koutou mamahi. Otira, ehara i te mea pai kia whakapaua katoatia te kaha o te tangata ki nga mea anake e ki ai tona puku, e tupu ai tona tinana : kia ata maharatia hoki te taha wairua, kia tupu tahi ai, kia ora tahi ai, me te taha tinana.

**Te Hui.** Tera ano tetahi take e tata ana ki tera take o te moni, ara te Hui. Ki te mea he take a koutou e korerotia ana, ka karangatia he Hui hei kohikohi moni mo taua mea, ara mo te Whare Karakia, Whare-puni, waea, aha ranei. Tera ano e puta atu e hia rau pauna o taua Hui, engari ka whakapaua nga rau, nga mano ranei i nga raruraru o te Hui. He Hui nui noa atu tenei o tatou—ka nui noa atu te utu mo ona raru. Kua puta mai te kupu ko te Hui whakamutunga tenei o nga Hui penei. He kupu pai tena. Ki te hiahia koutou ki tetahi moni mo te Whare nui, aha ranei, kia ata whakaritea he tangata pono hei pupuri i taua moni, kia tukua atu ki a ia nga hereni a tetahi, a tetahi, mo taua mea, kei maumauria te nuinga o te moni ki te kai, ki te takaro noa atu. Ki te mea no te Hahi tetahi take e kohia ai he moni, ko te mea pai ko tera i korerotia e Paora ki te hunga o Koriniti : ara kia ata whakatakotoria tetahi wahi i ia Ratapu, i ia Ratapu, a, i te wa kua tupu taua mea kia nui, katahi kia tukua ki taua take.

**Te Hinota.** Ka nui te hiahia o te Pihopa kia tae atu te Minita Maori ki Nepia ki te Hinota i ia tau, i ia tau. Ka tupu ano i reira tetahi raruraru, koia tenei. Ka tukua e nga pariha pakeha he moni ki te Hinota hei whakaea i nga raruraru o te Minita i tona haerenga ki te Hinota, kei taumaha te Minita.